

Folkehøjskolit pillugit Inatsisartut peqqussutaat

Kalaallit Nunaanni folkehøjskolit pillugit inatsimmi nr. 609-mi 23. december 1980-imeersumi § 2 naapertorlugu makku aalajangersarneqarput:

Siunertaa ilinniartussanillu tigusisarneq

§ 1. Folkehøjskolit ilinniartut inersimasut nalinginnaasumik paasisimasassanik ilisimasaqalernissamut ilinniartitsinssamik neqeroorfigaat tamatumalu iluani ilinniartitsissutissatut sammisat ataasiakkaat imaluunniit ilinniartitsissutissatut sammisat ataatsimoortukkuutaat sallitissinnaallugit.

Imm. 2. Folkehøjskolit, pissutsit immikkut ittut atuutsillugit, maleruagassat Naalakkersuisunit aalajangersarneqartut malillugit pisinnaatitaaffimmik pissarsitsisumik ilinniartitsinermik neqerooruteqarsinnaaput.

§ 2. Folkehøjskolit højskolernissamut ilinniartussanik tigusisassapput. Naalakkersuisut folkehøjskolinit oqaaseqaatinik pissarsereernermikkut ilinniartussat qinnuteqartarnissaat tiguneqartarnissaallu kiisalu ilinniagaqarnersiutit, matuma ataani ilinniagaqarnersiutit qanoq tunniunneqartarnissaat aalajangersaaffigisinnaavaat.

Aqutsineq

§ 3. Folkehøjskolit suliffeqarfittut nammineq pigisutut ingerlanneqassapput, pingaernerusutigut aqutsineq siulersuisunit isumagineqassalluni.

§ 4. Siulersuisut folkehøjskolip ingerlanneqarneranut siunissarlu ungasinnerusoq eqqarsaatigalugu ineriartornissaanut maleruagassanik aalajangersaassapput. Siulersuisut sammisassat aalajangersassavaat taakkulu siunertamut naapertuuttunissaat akisussaaffigalugu, tak. § 1.

Imm. 2. Siulersuisut folkehøjskolip pisortaanik atorfinititsillutillu soraarsitsisassapput.

Imm. 3. Siulersuisut folkehøjskolimi ileqqoreqqusat siulersuisunullu suleriaasissat suliarissavaat.

§ 5. Pisortap atuartitsinermut tunngasut akisussaaffigai folkehøjskolillu ulluinnarni aqunneqarnera isumagisassaralugu. Pisortap qulakkiissavaa suliffeqarfip maleruagassat atuuttut malillugit aammalu malittarisassat siulersuisunit aalajangersarneqartut naapertorlugin aqunneqarnissaa.

Imm. 2. Folkehøjskolimi pisortaq sulisunik atorfinititsillunilu soraarsitsisassaaq.

Folkehøjskolnik akuersisarneq

§ 6. Folkehøjskolit Inatsisartut peqqussutaat manna malillugu tapiiffingineqartassagunik Naalakkersuisunit akuerineqarsimassapput kiisalu tapiiffingineqarnissamut piumasaqaatinik naammassinnissimassallutik, tak. §§ 8-10.

Imm. 2. Naalakkersuisut folkehøjskolit akuersissutigisinnaavaat

1) malittarisassat Naalakkersuisunit akuersissutigineqarsimappata, aamma

2) folkehøjskolip init naleqquttut atortullu pisariaqartut pigippagit.

Imm. 3. Folkehøjskolip malittarisassaani ilaatinneqassapput:

1) Suliffeqarfiup imminut pigisup aqqa.

2) Kommuni, suliffeqarfiup imminut pigisup najugaqarfisaa.

3) Suliffeqarfiup imminut pigisup siunertaa.

4) Suliffeqarfiup imminut pigisup pilersinneqarnerani pigisat aamma nammineq aningasaatigineqartut nalingat.

5) Pisinnatitaaffit imaluunniit iluaqtissat immikkut ittut pilersitsisumut imaluunniit allanut tuttussat.

6) Siulersuisunut ilaasortat inuttalersorneqarnerat amerlassusaallu, qanoq toqcarneqarsimanersut kiisalu piffissaq atuuffiusussaq.

7) Naatsorsuutit saqqumiunneqartarnissaannut maleruagassat.

8) Sinneqartoortut sumut atorneqarnissaat.

§ 7. Naalakkersuisut akuersissut utertissinnaavaat § 6, imm. 2-mi piumasaqaatit folkehøjskolip naammassisinnajunnaarpagit. Naalakkersuisut aammattaaq akuersissut utertissinnaavaat folkehøjskolip atuartitsinera imaluunniit pissutsit allat § 1-imi aalajangersakkanut erseqqisumik akerliusutut isumaqarfingineqarpata.

Imm. 2. Imm. 1-imi oqaaseqatigiit appaat malillugit akuersissutip utertinnissaa aatsaat pisinnaavoq iliutsit annertunnginnerusut misilinneqareerpata.

Tapiissutit

§ 8. Naalakkersuisut folkehøjskolinut akuerisaasunut aningaasanut inatsimmi aningaasaliissutigineqarsimasut iluanni tapiissuteqartassapput makku piumasaqaatigalugit:

1) Folkehøjskolit pisortaat ilinniartitsisulu akissarsiaqartinneqassapput Naalakkersuisut isumaqatigiinniuteqarfingisartagaasa iluanni atorfinnut assingusunut maleruagassat malillugit. Atorfekartitaanermi atugassaritaasut allat allaganngorlugit isumaqatigiissutaassapput.

2) Folkehøjskolip Naalakkersuisunut qulakkeersimassavaa folkehøjskolemi pisortap ilinniartitsisullu naleqquttumik soraernerussutisiaqalernissaat qulakkeerneqarsimasoq.

3) Siulatorsuisut ukiumoortumik nalunaarusiaq naatsorsuutinut missingersuutinullu peqatigitillugu nassiuttassavaat.

4) Folkehøjskolip sammisassat pillugit pilersarusiaa Naalakkersuisunit akuersissutigineqassaaq.

§ 9. Naalakkersuisut aningaasanut inatsimmi aningaasaliissutigineqarsimasut iluanni folkehøjskolinut tapiissuteqartassapput,

1) sivikinnerpaamik sap. akunnerinik 36-nik tapiissutinik pissarsinissamik pisinnaatitaasunik atuartitsiviuppata,

2) atuartitsineq marloriarluni folkehøjskolimi atuarnissatut aaqqissuunneqarpat,

3) atuarnissaq sivikinnerpaamik sap. akunnerinik 13-inik sivisussuseqarpat, kiisalu

4) tapiissutinik pissarsinissamik pisinnaatitaasunik atuartitsiviusumi atuartut ukioq naallugu atuartussat 20-ussappata.

Imm. 2. Atuartutut ukioq naallugu atuartussatut paasineqassaaq atuartoq ukiup ataatsip ingerlanerani sap. akunneri 36-ni atuartussaq.

Imm. 3. Tapiissutissat naatsorsorneqartassapput ukiumut atuartussat amerlassusiat sapaatillu akunneri atuartitsiffiusussat tapiissuteqarfingineqarsinnaatitaasut amerlassusiat tunngavigalugit.

Imm. 4. Naalakkersuisut folkehøjskolinut tapiissutit tunniunnissaat aqunneqarnissaallu pillugit maleruagassanik aalajangersaasinjaapput, tamatumanissaaq ilanngulligit ukiumut atuartussat ikinnerugaangata kiisalu sap. akunneri atuartitsiviusussat ikinnerugaangata tapiissutit ikilineqartarnissaat.

§ 10. Folkehøjskolit nunatta karsiata tapiissutasa aammalu isertitat allat ataatsimoortillugit atornerisigut siunertamik iluanni kiffaanngissuseqarlutik atuissapput. Taamaattorli piumasaqaatigineqarpoq atuartitsineq tapiissuteqarfiusoq maleruagassat atuuttut aamma atuartut amerlassusissaat tapiissuteqfigineqartoq naapertorlugit ingerlanneqassasoq. Folkehøjskolit aningaasat atorneqanngitsut ukiunut aningaasaliiffiusunut tullernut nuussinnaavaat.

§ 11. Naalakkersuisut folkehøjskolini pisortat ilinniartitsisullu ilinniaqqinnerannut pikkorissarnissanullu tapiissuteqarsinnaapput.

Imm. 2. Naalakkersuisut ilinniartitsisullu ilinniaqqinneranni tamakkiisumik ilaannakortumilluunniit sulinngiffeqarlutik akissarsiaqartinnissaannut taapiissuteqarsinnaapput.

Ilinniagaqarnersiutit

§ 12. Ilinniartut sivikinnerpaamik sapaatit akunneri 13-inik sivilissusulimik tapiissutinik pissarsinissamik pisinnaatitaaffiusuni folkehøjskoliittussat ilinniagaqarnersiutit pillugit nalunaarummi maleruagassat naapertorlugit tapiissutisissapput. Taamaattorli folkehøjskoliinnissap aallartinnerani, unitsinnerani naammassineranilu ilinniartup angalanissamut akiliunneqarnissa taamaallaat tapiiffigineqartassapput kiisalu nerisaqarneq ineqarnerlu ilanngaatigalugit ilinniagaqarnersiutit tapiissutigineqartassallutik.

Imm. 2. Folkehøjskolit akuerisaasut siulersuisuinit inassuteqaateqarnikkut Naalakkersuisut folkehøjskoliinnermut sivikinnerpaamik sap. akunnerinik 13-inik sivilissuseqartumut ilinniartup sap. akunneranut akiliutigisartagassaa aalajangertassavaat.

Imm. 3. Kalaallit Nunaanni Kommuneqarfiit Kattuffiat siunersioreerlugu Naalakkersuisut aalajangertassavaat imm. 2-mi ilinniartup akiliutissaata akuerineqartup ilaa qanoq angitigisoq ilinniartumit namminermitt akilerneqartassanersoq aammalu qanoq angitigisoq kommunemitt najugaqarfigisaanit akilerneqartassanersoq.

Nakkutilliineq

§ 13. Naalakkersuisut folkehøjskolinik nakkutilliissapput siunertamullu tamatumunnga paasissutissanik pisariaqartinneqartunik pissarsiniarsinnaallutik.

Imm. 2. Tapiissummik utertitsisarnissaq tapiissuteqartarnerullu unitsinneqartarnissaapput Naalakkersuisut maleruagassaliorsinnaapput.

Misiligaalluni sulineq

§ 14. Naalakkersuisut Inatsisartut peqqussutaanni aalajangersakkanik saneqqutsisinnaapput Inatsisartut peqqussutaanni pineqartut iluanni misiligaalluni suliaqarnissap siuarsarnissaas pisariaqartinneqarpat.

Atortuulersitsinissaq atorunnaarsitsinissarlu pillugit aalajangersakkat

§ 15. Inatsisartut peqqussutaat 1. januar 2003-mi atuutilissaq tamatumalu peqatigisaanik folkehøjskolit pillugit Inatsisartut peqqussutaat nr. 1, 16. oktober 1980-imeersoq atorunnaassalluni.

Imm. 2. Højskolit pillugit Inatsisartut peqqussutaat nr. 1, 16. oktober 1980-imeersoq naapertorlugu folkehøjskolit akuerineqartut akuerisaasutut isigineqarput. Taamaattorli folkehøjskolit siulersuisisa

malittarisassat kingusinnerpaamik 1. marts ukioq 2003-mi Naalakkersuisunit akuerisassanngorlugit nassiuutereersimassavaat.

Namminersornerullutik Oqartussat, ulloq 21. maj 2002

Jonathan Motzfeldt

/

Karl Kristian Olsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaquataasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut